

Et 25. Friisk Harfsthuuchschölj

Bräist. Jubiläum bai e Friisk Foriining: 25 tooche Friisk Harfsthuuchschölj! Foon e 5. bit 9. oktober wårde wider en grut önjtål ünlike aktiwitääte önjbin, weer for ålem e friiske språke önj e madelpunkt stoont. E pääsene rääme deerfor бүt wider en tooch et dānsch följkehuuchschölj önj Jarplund, weer åle diilnaamere önj ainkelt än döoweltdörnsche unerbroocht san.

Huum frasch liire wal unti ål deerbai as et tu liiren, as jüst sü wäljkiimen as da, wat et ål koone. Dåt bait harfsthuuchschölj da ünlike wariante foon e nordfrasche språke aw enouder dråawe, wårt as besuners poositif önjšanj.

Dåt amfångrik program seet ham jarling üt årbesfloose tuhuupe, wat jam ma frasch teooter, Tai Chi, recycling-kunst unti et üülj frasch koordespal knüfeln befoote. Önjbin wårt uk wider en fraschkurs for önjfångere, hoorne twiten än praagel-grafiti. Än dan schal'r uk nuch en friisken wiirwefilm productsiird wårde.



Hiirt tut harfsthuuchschölj: et schoulbord

Tut räämeprogram hiirt jarling wider et schoulbord (awt bil boowen), ouers uk en filmfordreeging ouer e språkeräis tu da ladiinere än en berucht ouert oufluupen foon e Camino del Norte (nordlike Jakobs-wäi). Widerhaane en ütfluch tut följkskundemuseum önj Slaswik än en weedstrid önjt boogschiijen.

Wårt Kataloonien ünoufhängi?

Barcelona. Jü bewääging, wat har for en ünoufhängihäid foon Kataloonien inseet, fäit mör än mör önjhängere. Dåt hängt deerma tuhuupe, dåt et regjonaalparlamänt beslin heet, önj ferbining ma e näist lokaalwool e 25. nowämber en fölkeoufstiming ouer en oufspalten foon Spaanien döörtufäären.

Jü spaanisch regiiring önj Madrid ferseecht nü än ferhaner jü följkeoufstiming ma en ferfootingsklåage. „Dåt schönj ja liiwer lätje“, säit e regjonaale premjeeminister, Artur Mas. H ferwiset aw e regiiring önj London, wat klöker ouerfor Schotlönjs ploone am en fölkeouftiming hoonelt.

Språkeräis tu e ladiinere

Risem-Lunham. Da knååp 20 nordfrasche, wat uner e foone foon e Friisk Foriining iinj waag önj e juuli e ladiinsch manerhäid önj Itaalien beseecht hääwe, san åltumåale wi gödj önj Nordfraschlönj önjkiimen. Ja kjar-den ma en äinen räisebus bit Sankt Martiin önjt Gaderdool önj e Dolomiite, made inönj e ladiinsche språkeberik. Süwålj aw e haanewäi as uk tubääg hāin ja en nåchtkwartiir aw e näide foon Bayreuth. Wilt da fiiw deege, wat ja önj e Dolomiite wjarn, fungen da frasche ålerhånd amt pääsen än pläägen foon e ladiinsche språke tu hiiren. En språke, wat nuch foon süwat 30.000 manschne spreegen wårt.

Da frasche besechten möre ladiinsche inruchtige, deeruner et ladiinsch blees "La usc dle ladins", et kultuurinstituut "Micura de Rü" än uk möre ladiinsche musée. E Friisk Foriining hoowet nü aw en iinjbesäk foon e Ladiinere.

**Friiske tisinge arken dāi nai uner:
www.friiskforiining.podspot.de**

Fäit Söl en äinen fiirsiisiinjer?

Wäästerlön. Et ailönj Söl schal felicht bål en äinen fiirsiisiinjer füünj. Di priwoote siinjer "Sylt 1" as paroot än kam tu önjfång foont näist iir ma en äin program. Ploond as fort jarst än määg arken dāi en 20 minuite lung magatsiin, sää e Kölner meediekuupmoon Axel Link. Link as di moon, wat e idee for dåt projäkt, än hi as et uk, wat e pääsene giiljpong deertu heet. Oudere swäärpunkte foont program schan haanewise aw dåt, wat awt ailönj schait än wäädermaldinge weese. Fjouer redaktöore aw Söl än fjouer oudere önj Köln schan e siinjinge määge än präsentiere. Et program schal önj e digitaale kabelneete önj Hamborj än Slaswik-Holstiinj inspised wårde. Deerma san süwat iinj miljoon hūshүүлje önjslin. Deertu kamt e gruter wården tål foon for ålem junge manschne, wat ouert interneet fiirsiien kiike. „Südānji kaame nuch mör möölike tukiikere deertu, äm for ålem da koostinge for sün projäkt san önj e fergāngene iirnge ordi dilgāngen“, sää Link. E meedieönjstalt Hamborj/Slaswik-Holstiinj sää, dåt „Sylt 1“ ål tu began foont leest iir e ferloof for en fiirsiifullprogram fungen heet.

**Impräsum: Friisk Foriining, Friisk Hüs,
Süderstr. 6,
25821 Bredstedt/Bräist
ViSdP: Manfred C. Nissen**